

Sketch 2: Beste bientien veur

1643.

Naobi'j St. Maarten. Opdracht van de WIC om mit 300 seldaoten St. Maarten op de Spanjaarden te veroveren.

Pieter is krek benuumd tot directeur van Curaçao en verdient veur de WIC de kost mit slavenhandel.



Speulers:

Douwe Dekzwabber (D) – matroos
Sietse Scheurboek (S) – koksmoot
Pier Pennelikker (P) – boekhoolder (hoolt et scheepsjournaal bi'j)

Figuranten:

Sunderklaos – betien tekst
Pieter Poot – betien tekst (let op: Pieter het nog gien hoolten bien)

Douwe, Sietse en Pier an dek.

Douwe is et dek an et zwabberen. Sietse zit eerpels te schillen. Pier zit vanzels weer in de boeken.

- S: Zeg Pier, vertel ie oons nog veerder over Pieter Stoevesaant?
D: Ja Pier, dat hej' oons wel beloofd.
P: Jim hebben geliek. Es even kieken, waar za'k es veerder gaon?
D: Now, jow hadden verteld dat Pieter daor in Franeker iene Sofie verwend hadde en doe van schoele sturd was.
S: Ja krek. En doe gong hi'j gedichies schrieven op Curaçao.
P: Da's wel een hiele vri'je saemenvatting, heren. Mar goed, ik hebbe nòg wel een aorig feitien. We gaon veerder naor et jaor 1643... Sint Maarten.
D: Oei, wacht even! (*Draeft of*).
P: Wat zuwwe now hebben?
S: Gien idee, mar hi'j schient haost te hebben.
P: En wat doen wi'j now? Waachten?
S: Tja, rere fratsenmaeker die Douwe. Zol ie an de raceri'j wezen?
P: Zol kunnen.... nao die bonen van gisteren....
S: Ho ho, daor was niks mis mit, Pier. En an dat inkelde siepeltien kan et ok niet legen hebben.
P: Now ja, mar wat doen we now?
S: Barst mar gewoon los mit jow verhael, Pier. Ik bin ommeraek ni'jsgierig.
P: En Douwe dan?
S: Moet ie mar niet votlopen.
P: Now goed dan. Waor was ik bleven? Oh ja, et jaor 1643.... Sint Maarten. (*D komt zingend op mit een lampion*)
D: 11 November is de dag, dat mien lochien, dat mien lochien
11 November is de dag, dat mien lochien branen mag.
S: Zee ik et niet, Piere? Een rere fratsenmaeker, die Douwe.

- Schiet op, Douwe. Gao zitten, dan kan Pier beginnen.
- P: Sint Maarten dus, et jaor 1643. Dat wil zeggen... niet Sint Maarten zels, mar de zee bi'j Sint Maarten.
- D: Aha, we vulen nattighied.
- S: Sst! Stille, Douwe. Gao deur, Pier.
- P: Pieter Stoevesaant was krek benuumd tot directeur van Curaçao.
- D: Deur wie?
- P: Deur de West Indische Compagnie.
- S: Zo, da's niet misselik.
- D: En wat dot zoe'n directeur van Curaçao? Vassies schrieven? Krek as de laedmeester?
- P: Nee nee, Pieter hadden et hier wel knap drok mit.
- S: Mar waormit dan precies? Krek as Douwe zegt: wat dot zoe'n directeur?
- P: Tja, da's eins niet zo fraai om te vertellen.... Pieter hul zich veurnaemelik doende mit slavenhandel.
- D: Slavenhandel? Schande!
- P: Klopt. Mar daar dochten ze doe aandere over.
- S: Slaven? Waor kwamen die vot dan?
- P: Veurnaemelik uut Afrika.
- D: Uut Afrika? En dan maekten ze die lange reize naor Curaçao?
- P: Ja Douwe. Zo gong dat in die tied. Honderden slaven an boord van een schip. Vongen en mitneumen om verkocht te wodden.
- D: Honderden? An boord van een schip? Op zoe'n lange reize?
- P: Ja, die dreven soms maondenlaank op zee rond.
- D: Die dreven op zee rond?
- P: Ja.
- D: Oh... die dréven op zee rond, zeggen jow... Misschien vandaor et woord slavendriever.
- S: Flauw grappien, Douwe.
- P: Mar die slavenhandel is niet waorover ik jim vertellen wil.
- S: Oké, gao veerder. We bin op de zee bi'j Sint Maarten in 1643... en dan?
- D: À propos Sint Maarten. Ik hebben nog gien snoepien had veur mien mooie lietien.
- S: Hool op mit die flauwekul, Douwe!
- D: Goed goed... was mar een grappien...
- P: Pieter was deur de WIC naor Sint Maarten sturd. Dat was in hanen van de Spanjaarden en Pieter moest die daar votjaegen.
- D: Toch niet in zien ientien?
- P: Nee, vanzels niet. Hi'j hadde 300 seldaoten bi'j 'm an boord van een peer boten.
- S: Ah, dat loopt uut op een zeeslag.
- P: Juust. En dat gaot d'r mal om weg.
- D: Harrebakkes, we gaon toch niet van die bloederige verhaelen kriegien, wel?
- S: Kuj' dan niet slaopen vannaacht, mien mannegien?
- D: Ikke wel. Ik kan altied wel slaopen.
- S: Ja, dat weten we. Mar gao veerder, Pier. We veren bi'j Sint Maarten, mit 300 seldaoten an boord.
- P: Ja dat wodde een heftige stried. En een bepaolende veur Pieter.
- S: En het hi'j de Spanjaarden versleugen?
- P: Niet zo hadde, Sietse. Daar kommen we zo op. Vol goeie moed wodden in alle vroegte de kenonnen laeden, de musketten in gereedhied brocht, en....

D: Muskieten? Oh ja, die kun ontiegelik gemien stikken.

S: Musketten, Douwe. Niet muskieten, mar musketten. Dat bin geweren.

D: Oh ja, dat zol best es zo wezen kunnen.

P: ...in gereedhied brocht dus en Pieter ston stoer an de reling van zien schip.
(*Pieter komt op de achtergrond op en stelt zich stoer op 'an de reling'*)

P: Hi'j was d'r wis van, dat hi'j die Spanjaarden wel even een lessien leren zol.

Pieter: Ik zal die Spanjaarden wel even een lessien leren!

P: Et duurde niet lange, of d'r verschenen zeilen an de horizon.

En een schoffien laeter zag Pieter dudelik de Spaanse vlagge boven in de masten wapperen.

Pieter: Ik zie de Spaanse vlagge boven in de masten wapperen.

D: (*dri'jt zich omme naor Pieter*) Mooi, dan is d'r mit jow ogen niks mis!

S: Douwe, hool je mond now es even. Gao veerder, Pier.

P: De spanning was vanzels om te snieden. Hoe zol dit oflopen?

Et duurde niet lange of de Spaanse boten weren binnen beriek. De kenonnen dreunden. Zowel die van Pieter as de Spaanse.

Et Spaanse vlaggeschip kwam al dichterbij.

Inkelde minuten laeter kon Pieter de Spaanse commandant herkennen an zien typisch Spaanse uniform.

(*Sunderklaos komt op de achtergrond op en stelt zich op 'an de reling' tegenover Pieter*)

P: Onder et waepengekletter raosde de Spaanse commandant Pieter toe dat hi'j op moest holen mit zien geraos en getier...

Sunderklaos: Makkers! Staakt uw wild geraas!

P: Mar Pieter was niet van plan in te bienen. En vuurde et iene salvo nao de ere of op de Spaanse boten. Hi'j vreug zich of of die Spanjool wel in de gaten hadde, wie hi'j tegenover zich had.

Pieter: Weten jow wel wie jow tegenover jow hebben!

Sunderklaos: 't Is een vreemdeling zeker! Die verdwaald is zeker!

P: En doe gebeurde d'r wat verschrikkeliks.

D: Et struigoed was op!

P: Welnee... veul slimmer dan dat. Pieter wodde raekt deur een kenonskoegel.

D: Dood?

S: Welnee je, dat kan ommes niet.

D: Waaromme niet?

S: Now, dan was dit verhael klaor en konnen al die meensken weer naor huus.

D: Welke meensken?

S: In de zael. En dat moe'n we niet hebben vanzels. Die hebben ommes een kaortien kocht en willen waar veur heur geld.

P: Zal ik veerder gaon?

D+S: Graeg.

P: Pieter wodde dus raekt deur een kenonskoegel. Dat kostte 'm zien bien. Hi'j moest doe de stried wel staeken.

Pieter: Ik moet de stried staeken. Weeromme naor Curaçao.

P: Juust, weeromme naor Curaçao, weeromme naor de slavenhandel.

Sunderklaos: Slavenhandel? Slaven?

Pieter: Ja, slaven.

Sunderklaos: Zol ik mar mit oppassen! Daor komt in de toekomst wis nog een hoop discussie van!

(Pieter en Sunderklaos of).

D: Dag Sinterklaasje, daag, daag....

P+S: Douwe!!!

D: Sorry.

S: Hoe gong et doe verder mit Pieter. Die was toch zwaar gewond?

P: Klopt. Mar dat vertel ik een volgende keer.